



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Antonio Conte-i tangatettep nung Tottenham toktsüogo

Myanmar mitkari par den tokteper anema inyaksü nangzük



VOL. XX NO. 165 (ADOK 165) DIMAPUR SANGTENNÜ (TUESDAY)

METSÜREMI (MARCH) 28, 2023

₹ 5.00

CM Neiphiu Rio-i 2023-24 atema Rs 1,374.17 cr deficit budget benok

Kohima, March 27, 2023 (TYO): Chief Minister Neiphiu Rio-i Hombarnü Financial Year 2023-24 atema Rs 1,374.17 crore deficit budget benokogo.

CM Rio-i benokba budget nung tax tasen kecha mebenok. "Financial year 2023-24 nung Rs. 23,145 crore arutsü, Rs. 23,083.66 crore endoktsü aser Rs 60 crore anungzüksü" ta pai ashi.

"Taküm pensions aser GPF atema public accounts nung Rs 100 crore teimba akümba ajanga taküm Rs 40 crore negative balance nung tembangtsü. Ajisüaka iba nungji financial year 2022-23 indang negative closing balance Rs 1,334.17 crore bendenlokba ajanga taruba financial year nung Rs. 1,374.17 crore deficit nung tembangtsü" ta CM Rio-i metetdaksü.

Budget 2023-24 ya Budget 2022-23 dang nungi Rs 1,153.84 crore agi tajemba lir. Budget 2022-23 ji Rs 24,239.50 liasü.

"Nagaland-i sen talila aazüksü atema maparen kar inyaksü nungdaker. Iba atema state-i aruba bendanger dang yi ayoktsü melatsü shidanger. Nagaland Liquor Total Prohibition (NLTP) Act, 1989 nung star category nung aliba hotel kar nemo iba temelaba agüja lir" ta pai metetdaksü.

"April 4 nungi 6 tashi Kohima nung G-20 Business Meet alitsü aser iba mapang bendanger teshimtet nübo aika arutsü. NLTP Act kübok bendangertem aser

parnok den külemi arur nem yi agütsütsü melar. Anungji bendangertem aser parnok den külemi arur dang yi ayokba ajanga tourism maparen jenjang tajungba akümtsü" ta paisa ashi.

Sorkari NLTP Act agientsü tebilemba lir mali ta osangbeneri asüngdangdang "iba ya nübortem dak dang keta lir kechiyong 1989 küm nungi nübortemi state sorkar nem yi noktandakja arur" ta Rio-i langzü.

India aser Assam sorkartem den MOU sign sütepbä sülen Nagaland sorkari Disputed Area Belt (DAB) area nung totzü bushia atsütettsü tebilemba lir ta paisa ashi.

"Asenokbo kanga akoksar saka Assam-ibo arrtsülen rongsen agiteta agir, iba atema sorkari tebilemtsü abener" ta paisa ashi.

Nagaland State GST ajanga sen teimba anguba atema pelar kechiyong 2019-20 tsüngda Rs. 788.37 crore aazük saka 2021-22 nungbo Rs. 1,092.21 crore aazüka liasü, ta CM Rio-i metetdaksü.

2019-20 nung coal sector nungi Rs.53 lakhs aazük saka 2021-22 nung Rs 200 crore aazüka liasü. Forest sector nunga 2019-20 nung Rs. 13.72 crore aazükba nungi 2021-22 nung Rs. 14.06 crore aazükogo, ta paisa metetdaksü.

"Jenjang tajungba küma state sasa aazükbaji total revenue receipts nung 12.36% dang lir. Iba yagi sorkar mapa inyaker itasen ita

ana ser tesadang dang agütsüteter" ta Rio-isa ashi.

15th Finance Commission-i Revenue Deficit Grant (RDG) nung kümshia ajemtsü shia lir aser iba ajanga Nagaland-i takoksa ajurutsü. 15th Finance Commission-i 2020-21 nungi 2025-26 tashi küm pungu atema iba ya inyaksü shia lir aser iba ajanga RGD Rs. 910 crore agi tajemba akümtsü, ta paisa metetdaksü.

Commission-i revenue expenditure aser talisa itasen ajemtsü atema iba lemtet ya agiba ama bilemer. Nagaland nung itasen atema sen aika endoker aser iba asoshi Finance Commission ajunga amai tenük yoker, ta Rio-isa shisem.

"Anungji item tebilemtsü atema Nagaland-i sen tarulen lenmang bushiteptsüla, collection systems tajungba akümtsüla aser sen aolen reprangshimtsü nungdaker" ta paisa ashi.

State sorkari State Pension Sector ya computerise asütsü atema mapa inyaker kechiyong nisung kari Chief Minister's Health Insurance Scheme nungi tajangzük agir. Financial year 2021-22 nung pension expenditure Rs. 2158.67 crore liasü aser iba ya state senpong atema khuret tulu ka lir, ta CM Rio-isa ashi.

Külen, Power sector nunga tesüiba küm pezü tsüngda Rs. 1079.74 crore akoksaogo aser iba atema mapa inyaksüla, ta paisa shisem.

ULB Elections atema public den raratsü tebilemba mali: CM Rio Kin 8 hohotemi Nagaland Municipal Act yanglushitsü akhanger

Kohima, March 27, 2023 (TYO): Nagaland nung ULB elections magitsüla ta kin hohotem aser civil society temi rongshiba sülen Chief Minister Neiphiu Rio-i "state sorkari public anema noktaksü tebilemba kecha mali" ta shiogo.

"State sorkari Supreme Court indang tetuyuba sülen anidaker saka kin hohotem, civil societies aser Naga public-i maginüra 2017 küm ama sorkari raratsü renema mali" ta Rio-i osangbener dang ashi.

"March 9, 2022 nü telok aika adenshia senden ka amen aser idangji women reservation magientettsü saka ali aser ki nung tax agienba sülen ULB elections agitsü bangjemtep. Iba senden nung kin hohoajak, civil societytem, political party tem aser Naga lennir tongtipangtem aden" ta Rio-i ashi.

2016 amendment nung tetsürtem chairperson ama reservation densema liasü aser onoki iba mapangji aibelen saka public-i tang ang ola adoker, ta paisa ashi.

Kin hohotem aser public-i Nagaland Municipal Act yanglushitsü akhanger saka onoki Supreme Court-i tuyuba ama dang inyaker. Onok dang tetsükdaksü kecha melii ULBs maparen inyaksü shiogo, ta CM Rio-isa ashi.

Nagaland nung civil society balala nungi NMA 2001 atema ashishitepa arur saka tang

tesüsabuba osangji kin hoho 8 nungi aruba lir.

Angami, Ao, Chakhesang, Lotha, Pochury, Rengma, Sumi aser Zeliang hoho 8 den Tenyimi Public Organisation aser Central Nagaland Tribes Council züngsemtem tanü senden ka amendang "NMA 2001 ya tangar dang nungi apuzükba Act ka lir anungji Naga nung atema Arrla 371A dak kongshiba shilem ajak meyipa reprangshitsüla aser Naga nungeri aginüba ama yanglushitsüla" ta bangjemtep.

Tetsürtem nem Chairperson menden lemzüksüba ajanga tetemsü candidate nem temeten magütsür. Ano state sorkari women reservation indang kümshik mesüra mapang telatet indang osang tejangja metetdaksütsüla, ta parnokisa metetdaksü.

"NMA 2001 ya meyipa mereprangshitsü aser meyanglushitsü tashi ULB election magii atatsüla. Sorkar item takhangba atema meinyakra kin hohotemi ULB election mokdangtsü saka mapang shitak nung akhangba onüktem yanglushira ULB elections pusema nungitsü" ta parnokisa ashi.

Ao Senden-i senden avonger
Ao Senden Tongror ajanga March 29, 2023 anepdang 11:00 ako nung Ao Senden office nung ULB & Town Council election atema senden ka amentsü

ayongzükogo.

Iba senden nung Ao Senden Sanen Luden, Landowners' Board Mokokchung Town officers, All Ward Mokokchung Town officers, All Ward Union Changtongya Town officers, Tuli Town Ward Union officers, All Ward Chairman Association Mangkolemba Town officers aser Akhoya V/C, Changtongya V/C, Merangkong V/C, Wamaken V/C, Kangtsüng V/C, Khar V/C o Longjemdang V/C nungi nübo asemsem adentsü metetdaksür ta Tir Chubawati Longchar asr Tongti Tezülur Imtipokyim nati sangdong ka nung metetdaksüogo.

Changtongya town

Ano, March 27, 2023 nü Changtongya Putu Menden, Akhoya Putu Menden aser All Ward Union, Changtongya Town külem senden ka amendang bangzüng ka renemba metetdaksüogo.

"Ao Senden-i Nagaland Municipal Act 2001 meyipa reprangshir ang ULB election agitsü lemtetba sülen anidaksü aser osang tejangja ka maru tashi Changtongya Town ward kecha nunga nomination mesüi atatsü bangjemtep" ta Akhoya V/C Chairman Tiatemjen, AWU, Ctn Chairman Samuel Jamir aser Changtongya V/C Chairman Tiasunep nungeri sangdong ka nung metetdaksüogo.

Nagaland Budget : Financial Year 2023-24

Budget Allocations:

Agriculture Department	- Rs. 1,736.09 lakh.
Horticulture Department	- Rs. 590 lakh,
Soil & Water Conservation Department	- Rs. 400 lakh.
Animal Husbandry & Veterinary Services Department	- Rs. 470 lakh
Fisheries & Aquatic Resources Department	- Rs. 350 lakh.
Environment, Forests & Climate Change Department	- Rs. 420 lakh
Cooperation Department	- Rs. 250 lakh
Land Resources Department	- Rs. 600 lakh.
Water Resources Department	- Rs. 354.48 lakh.
Rural Development sector	- Rs. 3,400 lakh.
Department of Under Developed Areas	- Rs. 2,400 lakh.
Power Sector	- Rs. 1,902.28 lakh.
New & Renewable sector	- Rs. 220 lakh
Industries & Commerce sector	- Rs. 913 lakh
Sericulture Department	- Rs. 430 lakh.
Department of Geology & Mining	- Rs. 150 lakh
Nagaland State Mineral Development Corporation-	Rs. 318 lakh.
Roads and Bridges sector	- Rs. 5,680 lakh.
Mechanical Engineering Department	- Rs. 100 lakh
Road Transport sector	- Rs. 678.51 lakh.
Motor Vehicle Department	- Rs. 412 lakh.
Science & Technology Department	- Rs. 443.33
Department of Information Technology & Communication	- Rs. 416 lakh.
Tourism Department	- Rs. 1,055 lakh
Planning Department	- Rs. 578.66 lakh
Department of Economics and Statistics	- Rs. 320.49 lakh.
Department of Food & Civil Supplies	- Rs. 300 lakh
Department of Legal Metrology & Consumer Protection	- Rs. 150 lakh.
Department of Evaluation	- Rs. 270 lakh
Department of School Education	- Rs. 3,056.11 lakh
Department of Higher Education	- Rs. 1,123.07 lakh.
State Council of Educational Research and Training	- Rs. 510 lakh
Department of Technical Education	- Rs. 172.37 lakh.
Department of Youth Resources & Sports	- Rs. 1,025 lakh
Department of Art & Culture	- Rs. 350 lakh
Department of Health & Family Welfare	- Rs. 2,100 lakh
Department of Public Health Engineering	- Rs. 1,795 lakh
Department of Public Works (Housing)	- Rs. 3367.99 lakh
Justice and Law Department	- Rs. 292.47 lakh
Home Guards Department	- Rs. 497.77 lakh.
Jails Department	- Rs. 500 lakh.
Excise Department	- Rs. 132.42 lakh.
Urban Development Department	- Rs. 774.03 lakh.
Municipal Affairs Department	- Rs. 230 lakh.
Information & Public Relations Department	- Rs. 310 lakh
Labour Department	- Rs. 330.50 lakh
Employment, Skill Development & Employment Department	- Rs. 319.73 lakh
Department of Social Welfare	- Rs. 1,123.40 lakh
Women Resources Department	- Rs. 300 lakh.
General Services Sector	- Rs. 4,126.48 lakh
Fire & Emergency Services	- Rs. 968.08 lakh.
Treasuries & Accounts Department	- Rs. 136.74 lakh
Border Affairs Department	- Rs. 185 lakh
Parliamentary Affairs Department	- Rs. 50 lakh.
Taxes Department	- Rs. 491.54 lakh
Village Guards	- Rs. 275 lakh
Election Department	- Rs. 90.12 lakh
Home Department, Disaster Management	- Rs. 320 lakh
Tribal Affairs Department	- Rs. 150 lakh.
Minority Affairs Department	- Rs. 315 lakh.
Other allocations:	
State Matching Share to CSS	- Rs. 12,500 lakh.
CSS implementing departments	- Rs. 12,500 lakh.
Land acquisition	- Rs. 2,500 lakh,
CMCF	- Rs. 1,000 lakh
Monitoring Cell activities	- Rs. 100 lakh,
GIS and Remote Sensing Centre	- Rs. 150 lakh.
SDG initiatives	- Rs. 180 lakh
Innovative programmes	- Rs. 3,000 lakh

Nagaland Assembly-i Fire services & GST bill tem agizük

Kohima, March 27, 2023 (TYO): Nagaland Assembly-i Hombarnü government bill ana-The Nagaland Fire & Emergency Services Bill, 2021 aser Nagaland Goods and Services Tax (Sixth Amendment) Bill, 2022 agizüka ozüng kümogo.

March 23, 2023 nü Chief Minister Neiphiu Rio-i assembly nung bill ana ya benoka liasü saka MLA tem nungi temelenshitsü onük kecha bener maruba agi bill anaprong agizükogo.

Fire & Emergency Services

Bill ajanga Nagaland nung fire and life safety measures indang maparen ketdangtsütsü.

Külen, State Goods and Services Tax Act ya Nagaland Governor-i November 11, 2022 nü ordinance ka ajanga sangokja liasü aser Nagaland Gazette Extraordinary nungsa sangdongogo.

Hombarnü Chief Minister Rio-i Nagaland Lokayukta Annual Report, 2022 aser Nagaland Ceiling on Government Guarantee Rules, 2022 benok.

Governor-i Raj Bhavan nung kaketshirtem ayongzük



Governor-i Raj Bhavan nung kaketshirtem ayongzükba sentong nung tangokba nksa angur.

Dimapur, Metsüremi/March 27 (TYO): Kaketshirtem indang National Integration Tour -2023 nung shilem ka ama Students' Experiences in Inter-State Living ajanga March 27, 2023 nü Dr. Imkongliba Hall, Raj Bhavan, Kohima nung sentong ka ayongzükba liasü, kong tongti tesemdanger Nagaland Governor, La. Ganesan liasü.

Iba sentong nung jembidang Governor-i ashiba agi, Students' Experiences in Inter-State Living ya 1965 küm tir Acharaya Giriraj Kishore kübok Akhil Bharatiya Vidyarthi Parishad züngsemtemi tentet.

Students' Experiences in Inter-State Living yagi asen linük nung kaketshir ajak ka ama bilemdaktsütsü aser angatetdaktsütsü asoshi yarir aser talisa Northeast India aser linük tanüngba nungi lanirtem adianu ama bilemdaktsütsü asoshi inyaker, ta pai kaketshirtem dang ashi.

Iba sülen küm shia study tours aser cultural exchange program tem ayongzükba agiba ajanga kaketshir 1500 dak tema takum

nung kongshio, ta Governor-i ashi.

Iba takok angutsü asoshi SEIL ajanga mapa tulu inyaka aru aser ainer ama masü saka kibong ka nung züngsem ama amshi. Tour balala ayongzükba ajanga tesem balala nung sobaliba aser yimya tajungba angateter aser tayonger temia linük nung tesem balala nung yimsü balala angateter, ta pai ashi.

Iba sentong tenzükba anogo nungi tang tashinung sentong ayongzükba kibong 3000 dak tema iba sentong agi kongshio, ta pai ashi.

Linük ka kuma lungjemtsü asoshi maneni inyakba den külemi SEIL yagi North East India nung lanurtem nem skill development, financial literacy aser shisaliok agütsütsü atema inyaka arur, ta Governor-i ashi.

Pai ashiba agi, personality development aser leadership programs, internship aser nübur terenlok asoshi lenla ajak awajema training agütsüba ajanga linük tejakleni aotsü asoshi North East India nung lanurtem

nem tashi agütsütsü atema sapang agütsütsü nükjidong nung 2000 küm Yuva Vikas Kendra tenzük, ta pai ashi.

Azadi Ka Amrit Mahotsav nüngtem nung North East nungi kaketshir 482 tashi state 21-i February 2023 nung yoka liasü.

Governor-i taoba mapang sentong balala nung shilem agiba kaketshir nem tenüngsang agütsü aser tarutsü lenirtem nenok lir, ta shia liasü.

Students' Experiences in Inter-State Living-i kaketshir nem iba ama sentong tajung ayongzüktsüba atema pai tenüngsang agütsü liasü.

Paisa SEIL delegates tem nem iba sentong nung shilem agiba temiatsü kulizüng kaket agütsü aser sensaksem kaa liasü.

Students' Experiences in Inter-State Living delegates ti ajanga parnok tajangshibatem lemsatepa liasü aser parnoki otsü tulu aliba monument, university aser tesem balala sema jajaba chiyongtsü aser sobaliba balala ajangshibatem otsü lemsatepa liasü.

Mejangjabanisungtasümangka nguteta lir

Dimapur, Metsüremi/March 27 (TYO): Railway Station, Dimapur nung KM 258/3 nung mejangjaba nisung tasümang ka lir ta March 27, 2023 anepdang 12:30 ako meta Govt. Railway Police Station (GRPS), Dimapur dangi tezüluba nung osang ka aru.

Iba osang angashili duty party tem iba tesemi arsanga ao aser KM 258/2 aser KM 258/3 tsüingta railway track nung arishi küm 35-40 tsüingta nisung tebur ka (non-local) süa aliba ngutet.

Iba nisungba tekolak ya train track telung nung aliba ngutet aser tanüngba temang ya train track

tema nung shidak laoa liasü.

Iba nisungba ya train agi menüingset südi ta temolung melemteti lir. Ozüing agi melaba maparen ajak tembangba sülen tasümang ya post-mortem examination aser jangjatsü atema District Hospital morgue nung yua lir.

Iba nisungba ya T-shirt sentsü tanen, long pant sentsü temoro aser telung nung boxer sema liasü.

Kibur/kinunger/tembar temi Officer-in-Charge, GRPS, Dimapur den Mobile No. 7085055021 ajanga tongtepratepsü akok.

Impur Christian Hospital nung Medical Camp angati agitsü

Dimapur, Metsüremi/March 27 (TYO): Impur Christian Hospital nung April 3, 2023 nü angati medical camp ka agitsü.

Iba camp nung angati consultation agitsü atema Dr. Abigail Rai (MBBS, PGD in Aesthetic Cosmetology) alitsü.

Tejangrar temi Impur Clinic Mokokchung mesüra Impur Christian Hospital nung tsüinglanglen agütsü aliba phone number ajanga tenüng zülüoktsü akok.

Moala, Impur Clinic Mokokchung : 8731958233; Kasa, ICH, Impur : 7085608686

NSCN/GPRN ajanga asükhu lemsatep

Dimapur, Metsüremi/March 27 (TYO): NPGN/NNC indang ato kilonser, Z. Hozheto Chophy, March 27, 2023 nü asüba osang angazüka jashir, ta NSCN/GPRN sangdong ka ajanga ashi.

Asür Hozheto ya tangatetba shidak nung ochishia nokdaker ka liasü, shibai bendanga agütsür Naga nunger temeden asoshi inyaka aru, ta sangdong ajanga ashi.

Pa osü tanep saka tangatetba shidak aser nübur anitsü atema ochi shisatsü amshia liasü.

Shisa taka nisung asüba ya Naga nunger asoshi takoksa tulu lir aser Naga nunger ajungai mang ayimer, ta sangdong ajanga ashi.

Naga nunger asoshi pai anibelem mesasai jenjang tulu agi shilem agiba atema NSCN/GPRN ajanga Naga lenir nem akum tetushi agütsür.

Mangyimer kibong den NSCN/GPRN ajanga asükhu lemsateper aser asür tanüla teti tatem makai anisüngzükjang ta sarasademtsür, ta sangdong ajangasa ashi.

TOURISM - A LAND ENGULFED IN MYSTERY, DOTTED WITH MOUNTAINS AND VALLEYS; INHABITED BY WARRIORS ZEALOUSLY GUARDING THEIR COLOURFUL CULTURES AND TRADITIONS ALL ENTWINED TO FORM THE BEAUTIFUL LANDSCAPE OF NAGALAND.

TOURISM IS ONE OF THE FOCUS AREAS OF THE B20 MEET AT KOHIMA

Nagaland B20 BUSINESS MEET 5TH APRIL 2023 KOHIMA

[HTTPS://G20.NAGLAND.GOV.IN](https://g20.nagaland.gov.in)

TEPELA LEMSATEPER

Ya tashi anir aruba aser nenok ajak tenzüksü maongka kü nem agütsüba asoshi mezüngbuba nung Tsüngrem nem tenüngsang agütsür. Nenok sarasadem aser teyari medeni item ajak tamakoktsü liasü.

Kü dak tamang kaa nenok tenüng nung nokdaksü asoshi ni shimba atema 22nd Arkakong Assembly Constituency nürtem dang alakteta pelaba lemsateper. Ni ajemalushir asenok külemi asen Constituency temaba jenjangi ajungkettsü ta ni amanger.

Tatema democratic yimya nung shilem tajung agia toktepba asoshi Wb. Imnatiba danga pelaba lemsateper.

22nd Arkakong nürtem tenüng nung ni nokdaker aser ni Tsüngrem nungi shisatsü meshir asenok tarutsü asoshi tajungtiba nung inyaktetsü asoshi ajaki yariteptsü mepishir.

Kuknalim.



TEMEIM NUNG, NUKLUTOSHI LONGKUMER MEMBER OF LEGISLATIVE ASSEMBLY & NPP LEGISLATURE LEADER NAGALAND



SÜR KÜM KA AJUNGBA BILEMTETER



Asür C. Takotemsü Jamir March 28, 2022.

Tanü na onok den iba lima nung meliaka, onoki na kanga menungra a bilemteter.

-Temeim Kinungsü, Chirnur & Kinungertem.

Bilkis Bano ken o nung SC-i Centre aser Gujarat dang telangzüba meshi

New Delhi, March 27 (Agencies): 2002 küm Gujarat nung tashiyim amshia Bilkis Bano taküm raksatsüba ken o nung aija alir nisung 11 jail nungi chiocka sülen Bilkis Bano-i iba obandangji anema temepishiba ken o ka benoka lir, aser iba ken o dak sendakba nung Hombarnü Supreme Court-i Centre aser Gujarat sorkar na dang telangzüba agüjang, ta tuyuogo.

tulu adokba mapang nung Bilkis Bano arrshi küm 21 dang liasü aser la ita 5 mashisa liasü, ajisüaka tebur telok kati pa tashiyim amshia raksatsü aser lar jala arrshi küm 3 tanur ka densema lar kibong züngsem tenet tepseta liasü.

Supreme Court-i Gujarat sorkar dang April 18 tashi nungbo file ajak renemer liang, ta tuyu. Temepishiba ken o angadamba mapang nung Justices- K M Joseph aser B V Nagarathna nati akümba bench-i, parnoki ozüng kübok shidak inyaksü, ta metetdaksü.

Iba ken o nung aibelenertem chiocka anema benokba ken o taküm January 4 nü Justices- Ajay Rastogi aser Bela M Trivedi nati akümba bench-i angadang saka Justice Trivedi-i iba ken o maneni angadangsü memelungba agi CJI-i bench tasen ka tentet.

Taoba hopta Chief Justice D Y Chandrachud-i iba temepishiba ken oji angadangsü atema bench tasen ka tentetsü melunga liasü.

Yaküm August 15 nü Gujarat sorkari aibelenertem 11 prongla jail nungi chiocka sülen Bano dang masü saka National Federation of Indian Women, CPM MP Subhashini Ali, journalist Revati Laul, social activist Roop Rekha Verma aser TMC MP Mahua Moitra nungeria ibaji anema temepishiba ken o benoka liasü.

2002 küm Gujarat nung rara

Sübokrem agiba ken o ka nung BJP MLA Madal Virupakshappa apu

Bengaluru, March 27 (Agencies): Karnataka nung sübokrem agiba ken o ka dak sendakba nung Hombarnü Lokayukta police-i BJP MLA, Madal Virupakshappa puogo.

sübokrem sen lakh 81 akhang aser Virupakshappa'er jabaso, Prashanth MV-i pa indang office nung sen lakh 40 meshizükba mapang nung jakdaka apu. Tesülen police-i Virupakshappa'er kidang nungi sen crore 7 dak tema apu.

Iba ken o jungkai adokba sülen Madal-i Karnataka Soaps & Detergents Limited (KSDL) chairman nungi anena liasü. Par jabaso, Prashanth Madal-i sübokrem agizükba mapang jakdaka apuba sülen asüngdangyaba ajanga Madal Virupakshappa-i par jabaso ajanga sübokrem agibaji jangja.

Kasa ken o nungsa par jabaso Prashanth MV March 2 nü pua liasü.

KSDL dak sendakba nung sübokrem agiba ken o nung Virupakshappa-i anticipatory bail temepishiba agütsü, saka high court-i temepishibaji magizükba sülen Lokayukta-i pa apur.

Prashanth ya Bengaluru Water Supply & Sewerage Board (BWSSB) nung Chief Accountant inyaker. Kasa ken o nung tai tonglokja apurtem rongnung Prashanth den par kinünger Siddesh, accountant Surendra, Nicolas aser Gangadhar nunger densema lir.

Virupakshappa ya Davanagere district kübok Channagiri nungi MLA lir. Hombarnü Lokayukta police-i pa Tumkur Kyatsandra toll anasa apuba sülen Bengaluru-i anir ao.

Tan ita tetenzüklen Nicolas aser Gangadhar na office-i arua Prashant nem sübokrem sen lakh 40 agütsüba mapang nung apu, ta Lokayukta osang ajanga metetdakja liasü.

Lokayukta ajanga ashiba agi, bill ka agizüktsü atema pai

Karnataka nung assembly elections agitsü mapang ana nung lia opposition-i, sorkar ketdangsertemi tenders atema commission 40% agir, ta tai tongloktsüba mapang nung iba ya ataloker.

NEP kübok NCERT Textbooks tasen sangküm nungi amshitsü

New Delhi, Metsüremi/ March 27 (Agencies): National Education Policy (NEP) kübok revise asüba NCERT textbooks tasen 2024-25 kümsük nungi tenzüka school tem nung amshitsü, ta Hombarnü Education Ministry nungi ketdangsertemi metetdaksü.

Ministry of Education nungi tongti ketdangser kati, "Textbooks tasenji 2024-25 academic session nungi amshitsü. Ibaji mapa kanga tasak saka onoki iba nükjidong yur inyakdar. Textbooks ji National Curriculum Framework tasenba kübok revise asütsü, aser iba maparenji tenzüka teinyakdak lir," ta metetdaksü.

dang, digital ajanga angazüktsü tejangraba lir ta asenoki metetogo, anungji textbooks tasen ajakji digitally angutsü, ibaji ajanga ajaki itemji download sütettsü," ta ketdangserisa metetdaksü.

Textbooks ji National Curriculum Framework (NCF) kübok adoktsü.

"Covid-19 ajanga asenok

Textbooks ji teti atema masütsüla, anungji mapang shia textbooks update asütsü atema institutional framework ka yanglutsü, ta paisa metetdaksü.

Rahul anentsüba anema opposition-i süoshi tanak semer longkak ait



New Delhi, March 27, 2023: Congress lenir, Rahul Gandhi Lok Sabha MP nungi anentsüba anema Hombarnü Congress leniba nung opposition party balala nungi züngsemtemi süoshi tanak semer "Satyamev Jayate" banner den "democracy kümzükang" ta ozülu amer Vijay Chowk nung longkak aيتدang tangokba noksa nung angur.

New Delhi, Metsüremi/ March 27 (Agencies): Tawa Congress party lenir, Rahul Gandhi Lok Sabha nungi anentsüba anema Hombarnü Congress leniba nung opposition party balala nungi züngsemtemi süoshi tanak semer Parliament kima longkak aita jajaba den külemi Adani Group ken o bushisüngdangtsü takhangba agüja yimyim ayim.

lenirtem dang ni pelar. Kechiba onok yangi süoshi tanak semer adenshi? Ato kilonser Modi-i linük nung democracy samatsür, ta onoki sayuner. Pai mezüng autonomous bodies samatsü, iba sülen tesem ajaklen election nung takok angurtem amokmerena par sorkar amenoker. Iba sülen parnoki sorkar matsüngdang mapudakertem aziüktsü atema ED aser CBI amshir," ta Kharge-i ashi.

Opposition MP temi "Satyamev Jayate" banner den "democracy kümzükang" ta ozülu amer Vijay Chowk tashi longkak aita jajaba sülen parnoki mener longkak ait.

Rajya Sabha nung opposition Lenir, Kharge-i, Joint Parliamentary Committee tentetbaji amajok masütsü, parnoki report agütsüba ajanga inyakyim teladak akümtsü, ta ashi.

Congress Tir, Mallikarjun Kharge-i, sorkar matsüngdang mapudakertem anema Centre sorkari bushisüngdangba agency balala amshir, ta aitsü.

"Onoki asüngdangbatem sorkari melangzüteter. Tanü yangi party 18 nungi MP tem lir. Party ka danga madenba mali.

Iba ken o (Adani) bushisüngdangtsü atema onoki JPC akhanger. Ibaji ajanga ochi jungkai adoktsü," ta pai ashi.

Surat nung aliba court kati tenüng menüktsüba ken o ka nung Rahul Gandhi aitsüba sülen pa MP nungi anentsüba aija Kharge-i, "Nenoki Rahul Gandhi tenüng menüktsüner, ibaji ajanga pai jembiba otemji Karnataka kübok Kolar nung süaka nenoki iba ken o ya Gujarat-i belen. Tanü anogo ya democracy atema tanak anogo lir," ta ashi.

Kharge-isa, Ato kilonseri democracy samatsür, ibaji ajanga opposition MP temi süoshi tanak sübo, ta ashi.

"Nenoki ozüngji nenok kabu nung amshira democracy samatsü. O jembitsü atema shinga dak temeden malitsü. Ibayongji onoki longkak aiter. Adani kanga takar koma akümar kechiba sorkari ola madoker? Onoki JPC akhanger," ta Kharge-i ashi.

Hombarnep opposition MP tem Rajya Sabha nung opposition Lenir, Mallikarjun Kharge indang chamaber nung senden mena asalentong yanglua liasü. Iba senden nungji DMK, Samajwadi Party, JD(U), Bharat Rashtira Samithi, CPI(M), RJD, Nationalist Congress Party, CPI, IUML, MDMK, Kerala Congress, TMC, RSP, AAP, J-K NC, Shiv Sena (Uddhav faction) aser Trinamool Congress party tem nungi MP tema densema liasü.



TIR YIMYIM YIMOBILEM (EDITORIAL)

DIMAPUR SANGTENNÜ, METSÜREMI (MARCH) 28, 2022

ULB Election magitetsüa na ?

Taküm 2023 kuma Nagaland nung Municipal aser Town Council election magitetsü amai kumogo, kechiyong election ya government-i agitsü masü nübortemi agitsü aser nübortemi memulunger. Aji oda, Nagaland nung Municipal aser Town Council akümtsü asoshi temzüng ozüngbo lateta ayu saka kum 20 nunga iba mapa kuma moutetba ya temzüng ozüng yanglurtemi bilemdangtsü tuluka lir. Atangji, yimsüsürtemji temzüng ozüng yanglutsü shimtet saka yimsüsürtemi tatar senden nung latetba temzüng ozüngji nübortemi magizüktetra, aji shirnok atema latet asütsü ? Aji oda, yimtaka putu yimsüsürtemi ait nung latetba temzüng ozüngji jangkudokertemi magizüktetra aser ozüngji yimtak mapa kuma mebeshitetra, tatar yimsüsürtemji anentsüsa akümtsü. Tanü Nagaland nung Urban Local Bodies akümtsü atema election magitetsüsa akümba onük ya jungjunga bilemdangra, nübortemi shimtetba tatar yimsüsürtemi nübortem anema temzüng ozüng yanglu amai angateter. Ibaji tesüngmangtsüka lir. Atangji, government nung adener tatartemi benokba aser latetba temzüng ozüng ka opposition teloki anemerka asünungbo kecha mali, saka government-i latetba ozüng ka nübortem ajungai anemtsüsa akümbajibo government nung alirtem asoshi tatar senden nung "No Confidence Motion" makokba dang nungi tamajungba asütsü. Kechikodaser, tatar senden nung laletba ozüng ka nübor shingaia memulungtsüsa latet (?) ta tatartemi peisasa pei dang asüngdanga telangzüba bushitsübaji kanga tongtibang kumogo. Nagaland government-i sangdongba sentong apibo Nagaland nung Municipal aser Town Council election nung shilem aginürtem asoshi tenüng agütsütsü hopta ka dang lir. Ajisüaka, tanü tashi nung Nagaland nung tenteta akaba lokti tentetemi renemba olatem angadagra, ULB election agitsü atema government-i lemtetba pu kuma nokdakba osangbo ka danga mangashir. Tetezü taküm kuma Nagaland nung ULB election magitetsü. Atangji, Nagaland ya India telongjem kübok India temzüng ozüng kübok alir asünungji, sobaliba aser likalilem dak aketba tashi aser inyakyim dak alaka tanga sentong aser mapatem ajak India nung tanga state aser tanga town-tem den kasasa inyaka aoer. Aji oda, Nagaland-a tanga state nung inyaka aoba ama nütsüng agi abensaa aliba town tulutem asem Dimapur, Kohima aser Mokochung Municipal Council jenjang agütsüba den tanga town-tem town council kümdaktsüogo. Iba telemtetba nükjidong ya Nagaland nung town-tem ajak nung telidak nübortemi pei meyong town-a ta angateta terenlok sentongtem ajak nung shilem agidaktsütsü asoshi lir, anungji shitakba agibo nübortemi pelashishia agizüksüla aser government-i aginüba ama tekaratiba nung election agir pei kiyong aser mepu shia züngsem shima yoktsüla. Ajisüaka, nübortemi memulunger, anungji tashiyim agibo election magitetsü aserr government-ia tashiyim agi election agitsübo memerangtsüla, kechiyong magitetsü. Atangji, government-i ULB election aginübaji iba election agir Municipal aser Town Council kümtet nung dang, tanga state-tem nem agütsüba ama, India government-i Nagaland nung kümteta akaba ULB-tem dangi senotsü yoktsü aser asen lima nungbo Delhi nungi sen yok nung dang terenlok mapatemji inyaktetsü. Ajisüaka, senbo angu saka nübortem meyong temetenbo sama ta süra sen agi malizüktetsüba jenjang ka teti asoshi samar asütsü. Nübortemi shisabolua bilemba aser metongshidaktsünüba onükji yangji keta lir. Atangji, town-ji yimtsüng masü, anungji Village Council Act dak mekongshir ta government-i bilemer asütsüa akok, ajia shitak amato. Ajisüaka, Nagaland nung timtem saka ano tajung kaji town kuma aliba aliji yimtaklirtem meyong lir. Tetezü town kuma aliba ali kiburji government masü aser India temzüng arla 371A nung yimtsüng aser town indang ashir masü ali kibur temeten indang ashir. Iba jagi ali kiburtemi tebang aiter. Iba timtem ya bentetsü atema Nagaland Municipal Act ya ano tasensa Naga nung dak apet yanglushitsü nungdak ta nübortemi adokba olatem nungi angatetter. Iba mapaji Nagaland government asoshi tasak masütsüla.

OLEMSABANG

NI TARUTSÜ NAGA NUNGER TIANGUA NÜKTZÜ YIMA ZÜLUR

- SM. Meren, Ex.Pastor Ungma

(Yashi adok nungi...)

Taoba mapang tsüraburtemi Naga yimden longjemer tenzükdang State lenirtem ano kar dak alaka timbaka maso liasü südi, anungji yashi asori Naga yimden koda jembitsü? Mejembitetbaji tim dang lir, Tsürabur mapang Naga yimden tenzükertemi pei azü agi tenlatsü nangzük aser arem min longren longbang aser longpok nung lia Naga Nüchiso atema Nation mapaji inyak parnokji timbaka meyipa matok arem nung teret endok aser aji pei kin asoshi azü agi tenla, aser yimdaklirtemi peiang machimajem arema shidakba arem nung mirijang jenti lia alibapurtem nem tachi-tajemtsü, aben-süoshi aser senotsü teperi yimdaklirtemi agüja kum jenti mesü, hatir alitsü sen mirijang jenti kibong shia kangtepa mapang shia sarua agütsü, yimdaklirtem ajaki teret nung jangoka Naga Nation mapaji inyak, yamaji inyakdang taküm mezüngdangtet tepsetdaktsü, tepuokdaki kum ana asem arema ao, item ajakji arema yimdaklirtemi tizüka inyaka aru, aser yimdaklirtem pei aliba ki ajak asempen pezüben rongdokdaktsü, aser tsük jen ajak rongdoktsü, aser alu tsükma tajungdang tsükma ajak Army senoka nokdaker yoka talang agi tsükma ajak züka ao aser alu nung alirtem kaa arishia mezüngdangtet alu wadandak nung kaset aser ano 1957 kum piyong yimtsüng pezü pungu lokteper yim ka nung atsü tapu asem agi longbanger Armytemi nüka kolenia modaktsüi ayawara tulu ajurudakja Grouping nung kangshi, ibaji Yihuda nung Babilon nungeri Yirusalem makbanger kum ana asem süngkhum melapoki anükba agi ayawara nung aya marem tetsü anati pei chir tepseta soa achiba tia tashi atalokba ama asen Naga nungeri ajurua aruaka ajakji arema ali. Saka Naga nungeri tema nung alir tashir ishikati longjemer Naga nungeri yimdaklirtem teküp-tesü agi matir, aser tai maket nisung tajung ajunga tepsetmar anungji State agizüka India den longjema lia atadi ta jembir aji agizüka amshia aruba tanü tashi nung joko State kum 60 shi tain kumogo. Saka tanü State lenirtem kechiba Naga yimden den asayateper? Nagaland State Ankujong teka aliba nung party mezüngdangtet yanglur tanü ka nung asüng ka nung ta belentepa senzübaji pei ajung asaba teret maliba lenir masü no? Naga yimden meyanglutet tashi Election magitsü ajemshia nangzük masü no? tanübo repringang, Nagaland asoshi aruba sanction ajak kolen sama ajibo memetet aser Nagaland terenlokbo kecha nunga maka kidanger State dang taktsüka masü no? hau asü nunga? Aser Election nungbo teinyakdak party-i anir tetokteper timbakati Election nung sen Creole metsü-semer endokba osang lir, süra aji kongi nungi anguba? Ita sen nungi angubabo mesülito hau südi? Naga lima tejakleni maoba ya odangbo masü, Centre nungi lenmang balala nungi aruba sen ajak tapokleni sentokba tapokji Election tapokji lir hau südi? Sen ajak atsütena yur ibajagi Vote alitena jajabaji ABAM lemtet anema aser Arogo anema masü no? ABAM aser Arogoi lemtetba ama pei Voteji pei nem agütsüdakjang aser nütsüngi mulungba shimtetdakjang aser nütsüng nüburtem tai temenadaktsü, nisung shia nem temeden agütsüdakjang ta kum ana asem yimtung nung aser tenla kidang mapang ajak nung jembia aruba ajak entzü jakrep ama kumogo aser ABAM lemtet aser Arogo maparen ajak metsümeshidak nemoka yutsüogo. Tanü Election nung adokertem timba nütsüng nüburi sabuba agi atokba masü saka tashiyim agi adokba timba asütsü südi, iba jagi Naga lima telongi telongi aluba angur südi? Repranga liang memenui Naga lima ALAR tiai aitsü anasa lir, aser Naga lima tanüla tsütsü aser libaliro tsütsü nübur ajunga azüoka ayutsü asoshi aser Governmenti lemteta inyakba maparen aika nung nüburtem den aser tanülar maparen nung meputep inyaksangshiba aser ayongzükba item ajak metongshitsütsü asoshi Nagaland Baptist Churchi Councili anir kin shia pei pei mungdang yamaji Ao Baptist Arogo Mungdang nokdaka lir, anungji item jagi anir taküm general Electionbo Fair and clean Election südi ta kechiyong sen agi aliba, tashiyim agi atokbapurtem jagi Naga lima nung yimsü junga mesütetsü anungji nüburi mulungba nisung shimdaktsüdi ta lemteter mapang talangka yimtung nung Tenla kidang aser lokti lokti ayongzüka aser condidate jatena iba Clean Election indang shia ayimtena aruogo, iba nükjitung nung Wokha Town nungbo Tashirtemi anir Flag March Feb 23 nung tesüngmangtsü longsoa jajaogo, saka ajiang iba Town nungang prangbong injang amshia nisung ana asem yirutsü, ABAM anasa aliba kidanger Chungtia yimdakbo nisunga ka tepset, ABAM-i fair and Clean Election lenir asütsü Rev.Dr.Noklen Pastor shimteta Ao area ajak nung nai anir Clean Election sentongren inyakang ta nungloksü, anungji pai pei yimtsüng nungbo Ungma Laishir aniloker kanga meranga inyak, saka pa aliba yimtsüng nungang ano Clean Election magitsü ta songtem, sürabang Naga lima yabo tashiyim agi atokba lenirtemi dang yimsü asütsü asü nüburi mulungba nisung shimteta anidaktsütsü? Nagaland ya tenüng agi Democracy yimli ta jembir saka mapabo tashiyim yimsüsübayimli lir, nunga ta süra, süra kechiba nüburtem nem pei temeten magütsür?

(Maneni taruba adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Delhi Ao B/C lanurtem aser kaketshirtem saisapong sentong ka agi



Dimapur/Delhi, March 27 (TYO): Delhi Ao Baptist Church, Youth Ministry aser Delhi Ao Katetshir Telongjem longjemer saisapong sentong ka March 25, 2023 nü East Vinod Nagar Sports Complex, New Delhi nung ayongzüka agiogo, ta iba sentong tayongertemi sangdong ka ajanga metetdaksü. Delhi nung aliba

sensosangertem tulu-tila tebandang kecha makai ajaki iba sentong takok manung shilem agia liasü. Iba anogo asoshi Omen: "Jangyu Medemshir" (Harmonising in action) nung rangloker sentong ajak tepor jungjunga agiogo. Tetsür aser teburtem asaya telemsa balala- football, volleyball, basketball, arr

atsütepba aser tila tanurtem asoshi asaya balala ayongzüka monga liasü. Iba ama telongjem aser amalitep tanü tetenzüker sur tarutsü nunga maneni tepong küma langer jangyu medemshia asen Aoer lokti takok aser tali telongjem nung jajatsü lemsatapa iba sentong tembanga liasü, ta tayongertemi metetdaksü.

Hindu telok kati tribal Khristantem nem teyari magütsütsü mepishir



March 26, 2023 nü Guwahati nung Janajati Dharma Sanskriti Suraksha Mancha-i ayongzüka rally nung tangokba noksa nung angur.

Guwahati, March 27, 2023 (Agencies): Hindu nationalist organization kati India sorkar dang, Khristan aser Islam yimsü agizükba tribal nisungtem nem sorkar welfare teyari kecha magütsütsüla, kechiyong yimsü anaji bendanger yimsü, ta metetdaksü.

Lisopurtem ya scheduled tribes, ta züingshir aser Dalits ya scheduled caste lir. 1948 küm latetba ama item lisopurtem nem Centre aser state sorkartemi legislative bodies, educational institutions nung menden mekazütsür aser sorkar rejutem nunga mapa mekazüka yutsür, ajisüaka Khristan aser Islam yimsü agizüker Dalit nungertem nembo item ama tajangzük balala magütsür.

bendanga mezüingshir," ta ashi. Khristan putirisa, sorkar aser telok balalai tribal sobaliba aser oshitem wazüka ayutsü atema inyaksüla, ajisüaka yimsü meyipba nem tai metongloksütsüla, ta ashi.

March 26, 2023 nü Guwahati nung lokti den jembidang RSS den affiliate süa aliba Janajati Dharma Sanskriti Suraksha Mancha telok nung Tir, Binud Kumbang-i, "Lisopurtemi bendanger yimsü agizükba ya lisopur yimsü aser sobaliba atema amokmeren tuluka kümogo," ta ashi.

Dalit nunger nem item ama tajangzük magütsüba ama Kumbang-i ozüing yanglushia Khristan aser Islam yimsü agizüker lisopurtem nem-a sorkar tajangzük balala magütsütsü akhanger.

China nung ketdangsertemi pastor, Geng Zejun jail nungi chiokogo

"India nunger nütsüing billion 1.3 nungi nütsüing shilem 8.6 bo tribal nütsüing lir, aser tanga yimsü agizükertem jagi pei tribal sobaliba, külemküja aser libaliro ajak toktsüogo," ta pai ashi.

March 27, 2023 nü osangbener den jembidang Guwahati nung tongti putir, John Moolachira-i, "Iba ama takhangbaji lisopurtem atema tamajung asütsü. Nisung kati pai/lai melungba ama yimsü shimmer. Shingaia yimsü melendaksütsü atema tashiyim mamshir, anungji nisung ka yimsü nung ajemdaker sorkar teyari balala agentsü akhangbaji tim masü saka linük temzüing alema lir, kechiyong linük temzüing ajanga nisung

China kübok Ningxia Hui province nung ketdangsertemi Protestant pastor ka küm ka shi tepuokdak ayuba sülen chiokogo; Amongnü tekülem sentong ayongzüka agiba atema ketdangsertemi pa pua liasü, ta China Aid teloki metetdaksü.

Kumbang aser pai aniba organization-i ashiba agi, parnoki bendanger yimsü balala nungi lisopurtem kümzüktsü atema inyaker.

March 27, 2023 nü osangbener den jembidang Guwahati nung tongti putir, John Moolachira-i, "Iba ama takhangbaji lisopurtem atema tamajung asütsü. Nisung kati pai/lai melungba ama yimsü shimmer. Shingaia yimsü melendaksütsü atema tashiyim mamshir, anungji nisung ka yimsü nung ajemdaker sorkar teyari balala agentsü akhangbaji tim masü saka linük temzüing alema lir, kechiyong linük temzüing ajanga nisung

Arrshi küm 51, Geng Zejun ya Protestant house church-Church of the Rock nung pastor inyaka liasü aser taoba hopta pa Shizuishan city yimti nung aliba jail ka nungi chiokogo, ta March 23 nü China Aid teloki metetdaksü.

India nung Khristan aser Islam yimsü ya bendanglen tentetba yimsü ta züingshir, saka Buddhism, Sikhism aser Jainism bo linük nung tentetba yimsütem ta züingshir.

March 27, 2023 nü osangbener den jembidang Guwahati nung tongti putir, John Moolachira-i, "Iba ama takhangbaji lisopurtem atema tamajung asütsü. Nisung kati pai/lai melungba ama yimsü shimmer. Shingaia yimsü melendaksütsü atema tashiyim mamshir, anungji nisung ka yimsü nung ajemdaker sorkar teyari balala agentsü akhangbaji tim masü saka linük temzüing alema lir, kechiyong linük temzüing ajanga nisung

March 19, 2023 nü pastor jail

ANOGO ABEN TSÜNGREM DEN

Temeshi aser Mimpang - T.ken 77:11-20

Asaphi süngjema melitet. Pai tasüngdangba aika Kibuba dang asüngdang. Pa tezü atangba tatembang nung pa tesüngmangtsü telemtetba agütsü. Mezüngbuba, "O Tsüngrem, ne lemang temeshidak lir; ozü Tsüngrem ama tulu Tsüngrem shiba ali?" (A.13). Tanabuba, " Ne lemang tzüyim nung lir, aser ne tsüngsütem meputet" (A.19).

Tamang kuli meimlaba lemang nungi kuli asüba. Mezüngbuba, Tsüngremer lemang temeshilen lir, ta Asaphi ashi. Pa lemangji meshitettsüba aser temeshi lemang lir. Tsüngremi asenok taochi dangi anir aser taochi nungi sentsüwangshi dangi anir. Pai aibelen masür- Pa lemangji tajungtiba lemang lir aser liasü. Asenok Temeshitiba nung lira, asenoki Tsüngremer lemang bushitettsü. Asenoki Tsüngrem Temeshi o nung lira, asenoki Pa den temeshiba nung jajatettsü.

Tanabuba, Tsüngremer temang tzüyim nung lir. Pa temang mimpanga lir. Asenoki Tsüngremi aniba ajakbo mangatettsü akok, saka ibai metettsü akok.: Tsüngremi ashir. Asaphi ashi, " Nai ne nübur san telok ama anishi"(t.20). Pa lenmang tzüyim nung lir, aser pai anira, Pai tsüyimi na asoshi lapoktsütsü. Nüngdakra Pai na tsüma nung jajatsü yaritsü.

Saka ken züluri tatembang shidaki aru. Tsüngremer lenmangji temeshi, anungji pa dang tashi angang. Pa lenmang mimpanga lir, anungji amangang.

Tanü na timtem ka ajanga aor aser tasüngdangba aika asüngdang- kechiba, koda, kodang, kobika- Asaphi asüngdang. Pai anilen anidakba ajanga Tsüngremi na anasai arudakjang.



Pastor, Geng Zejun

March 27, 2023: China kübok Ningxia Hui province nung ketdangsertemi Protestant pastor ka küm ka shi tepuokdak ayuba sülen chiokogo; Amongnü tekülem sentong ayongzüka agiba atema ketdangsertemi pa pua liasü, ta China Aid teloki metetdaksü. Arrshi küm 51, Geng Zejun ya Protestant house church-Church of the Rock nung pastor inyaka liasü aser taoba hopta pa Shizuishan city yimti nung aliba jail ka nungi chiokogo, ta March 23 nü China Aid teloki metetdaksü.

nungi chiokba mapang nung pa temelung kanga raksa liasü. Pai kinüngtsü, jabaso aser pa agizüktsü aruba Khristan kar dak pai azüieter ajepba video ka social media nung kanga prokogo.

mesoittetba kuli sayur. "Nenoki maneni aria bilemja sarasademtsüba atema pelar. Tsüngremi nenok moajangma. Yimlibilema maneni Tsüngrem temoatsü atema sarasademjang," ta lai mepishi.

Pastor kinüngtsü, Hao Ying-i social media ajanga pa jail nung aliba mapang par kibong atema sarasademtsür ajak dang pelaba lemsatop. Lai social media ajanga, "Onok tenük nung nüktzü tsüngranger ajep aser Kibuba tanela ajanga ajungmesoa liasü. Iba atema Tsüngrem nem tenüngsang agütsür. Pa kilir sentsüwangshi nung meyipa aruogo. Taochi aser temoatsü tulu," ta lemsatop.

Pastor Zejun ya Ningxia Hui province kübok Shizuishan yimti nung kanga nüngtugu sayutsüingir ka lir. Iba yimti ya Inner Mongolia province den arrtsütepa lir.

Lai ashiba agi, pastor agizüktsü atema tamangertem dang masü saka mamangertema aika adenshia liasü, aser ibaji ajanga Tsüngrem sentsüwangshi shingaia

2005 küm nungi tenzüka pai tenzüka wadang nung toklang inyaker aser 2011 küm nungi Church of the Rock nung pastor inyaka liasü.

Mapang shia police aser Religious Affairs Bureau ketdangsertemi iba Arogo anema inyaker, kechiyong parnoki linüki melaba Three-Self Patriotic Church nung adentsü memelunger.

(Maneni tapak 8 nung...)

AO OSHI ANGAZÜKDAK:

TANÜ ANGAZÜKTSÜBA OJANG



Pezünu

(n) manga merila ama takümsangnu tila (stable fly)

* Nashi ak alidak **pezünu** kanga arur.

Pezünu

(n) atsük tila (young lice)

* Merükmeju masür kolak nung **pezünu** pokteter.

OLONG PAITEP # 6469

15x15 crossword grid with numbers 1-19 indicating starting positions for clues.

TIPIEN

- 2. Teburtemi tejak nung awaba - (8)
- 6. T _ _ _ em - (3)
- 8. Tzüik ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzu angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6468 TELANGZÜBA

TIPIEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden,
- 3. Kiochtsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.

KHEN SHISADANGDI

ALOKBA DAK LOKTI LENNIR ASÜTSÜ SEMPET KETA MALI

Oboula : Ohooiii...Semchir...Na ya lokti nung lennir asütsü kheni medemsüa noo.

Alokba : Obou...Ni ya tashitemeteter wabong tajung ka ... Aso-ajen topur-a kanga tajung ...Shisaliok nunga Degree tulu azüngba nübo ka....Ano ni loktiliba wainshin ajak kanga junga meteta lir... Ni sorkar mapa nunga Officer rank nung Retired asüba nübu ka lir...Ni ano kechi agi metemsüa ta ashir...???

Oboula : Semchir...Ne dak ozü/par ta bendanga amshiba (ism) ya kanga lir...Ne dak tejak-tebang repringba (Partiality) ya kanga lir... Ne dak naloknara.... tiak asangba...jaksa-jaklem yimya keta lir... Ano ne dak ni dang metet.... Ni alep, ni atsüng ta asüba jakla lir... Ibajagi ne lenisüba nung aikati manidakner aja.

Semchir : Ayaaa...!!! Obou...Ni kü sasa ni ya tangar ajak dang tajungba-a ta bilema liasüa...!!! Saka nai ashidang-jiang ni angajemogo...Nia melenshilabaaa...

~ Lilir : L.Kika Pongener.

NRFM-i kaketshir ka khasetba atema tenüng agir



Imphal, March 27, 2023

(Agencies): Honibar aonung Kangpokpi police station kübok NH-2 nung arishi küm 17 tain kaketshir ka tepsetba atema National Revolutionary Front, Manipur, (NRFM)-i tenüng agiogo.

Sharon Veng Motbung nung Lenkothang Misao'er jabaso Motbung Seigunlal Misao (17)-i ozüng alema mozü shilebenba mapa inyakba atema khaset ta Information and publicity secretary, central headquarters, NRFM Sanajaoba Meitei-i Hombarnü metetdaksü.

Pa dang aiben Sekmai bazaaru nungi Imphal tashi mozü shibelenba mapa meinyaksü ashi saka kaketshir jagi maneni inyak ta Sanajaoba Meitei-isa ashi.

Nübortem anema aser putu samatsütsüsa mapa inyakertem maneni merenshitsu ta NRFM-isa metetdaksü.

Manipur Chief Minister N Biren Singh-i tasür kibong nem Rs 5 Lakhs teyari agütsütsü aser bushisüngdang asütsü osang sangoktsüba sülen tanü NRFM-i iba osang metetdaksü.

"Seigunlal Misao asüba dak

sendakba nung JAC-i tanü kü den ajurutepogo. State sorkari Rs 5 Lakhs teyari agütsütsü aser nüngdakba bushisüngdangtsü" ta CM Biren Singh-i ashi.

Sorkari asür kinunger ka nem mapa ka agütsütsü asoshi bilemdangtsü, ta paisa shisem.

Lanurtem tepsetertem anogo pezü-pungu tsüngda aputsü ta Biren-isa metetdaksü.

S Misao tepsetba anema Joint Action Committee ka tentet aser parnoki Deobar aonung CM Biren den ajurutepa liasü.

Motbung nung aliba NH-2 nung JAC kübok Honibar aser Deobart anogotem lungkak aitogo.

Letpao Healthcare Centre nung aliba CCTV ajanga two-wheelers nung tetsür ka dena nisung kar senzüba menüngoka lir, ajisiüka item nisungtem maitsü ano mejangjatet lir.

Lungkak aitba mapang nisungtemi S Misao ji yimya tajung aliba tanur ka aser kaketshir tajung ka liasü ta shiogo.

North Lakhimpur nung Congress-i Sankalp Satyagraha agi

North Lakhimpur, March 27, 2023

(Agencies): Assam kübok North Lakhimpur nung Indian National Congress (INC) ajanga Sankalp Satyagraha ka ayonga agiogo.

Congress lennir Rahul Gandhi MP nungi anentsüba aser küm ana tepuokdak ayutsü temerenshi agütsüba anema Deobarnü parnoki lungkak ait.

Lakhimpur District Congress Office indang Rajiv Bhawan nung Satyagraha ayonga agi.

BJP-i linük madak tim mesüi yimsüsüba anema Congress-i

tuluba nung lungkak aittsü ta züngsemtemi ashi.

BJP-i Rahul Gandhi anema tesempatsü mapa inyakogota ex-Lakhimpur MLA Ghana Buragohain-i ashi.

APCC general secretary Padmalochan Dolwy-ia yimtsüngtem, yimtittem aser yimdongtem nung BJP anema ola adokba indang jembi.

Industrialist Gautam Adani aser Prime Minister Narendra Modi tsüngda miim tesentaktep lir aser linük nung public sen

agitsü atema tasa ka atonga lir, ta district Congress vice-president Baharul Islam-ia ashi.

Iba sentong nung District Congress president Gagan Chandra Bora, senior spokesperson Prashanta Gogoi, general secretary (Administrative) Gangajyoti Tayegam, Lakhimpur Assembly kübok blocks balala nung presidents & secretaries, tetsür Congress office bearers, Seva Dals nung den Congress züngsem 200 tema aden.

TIPRA Motha tanishir Pradyot-i lumia lungkak aittsü

Agartala, March 27, 2023

(Agencies): Centre-i interlocutor magütsüra mapang telatet makai lumia lungkak aittsü ta Tipra Motha chairman Pradyot Kishore Manikya Debbarma-i ashi.

Tripura nung lisopurtem atema 'Constitutional Solution' akhangba onük atema Centre

sorkari interlocutor ka magütsüra Tripura chuba jabaso Pradyot-i lumia lungkak aittsü.

Union Home Minister Amit Shah-i March 27 nü interlocutor tenüng metetdaksütsü aser TIPRA Motha-i Tripura nung lisopur lakh 14 indang tebilemstütem aser khurettem

atema 'constitutional solution' asadangtsü ta taoba mapang Pradyot-i shia liasü.

Union Minister Amit Shah-i pa dang March 27 nü interlocutor ka shimtsü aser iba nisung jagi Tipraland takhangba atema inyaksü shiogo ta Pradyot Manikya Debbarma-i osangbener dang ashi.



North East Institute of Fashion Technology (NEIFT) ajanga Sustainable Textiles Fashion Show, VASTRA 2023 indang 7 buba Edition ayonga agiba noksa nung angur. Iba sentong ya Exotica Greens, Guwahati indang Ambience Hall nung Deobarnü agi aser model 48-i shilem agia liasü. Iba sentong nung Assam nungi Designer Huangpi Gogoi, Arunachal Pradesh nungi Gona Niji, Meghalaya nungi Albert Marak aser NEIFT nung final year fashion design students-i puratetba ensembles 2 sayua liasü ta Festival Curator & NEIFT Chief Executive Officer Vikram Rai Medhi-i ashi.



**GOVERNMENT OF NAGALAND
DIRECTORATE OF TECHNICAL EDUCATION**

0370-2270409
0370-2271432

Nagaland : Kohima - 797 004

NO.DTE/EXAM/6/2020-21/4481

Dated, Kohima, the 27 th March, 2023

NOTIFICATION:

NO.DTE/EXAM/6/2020-21: Interested candidate are hereby informed to filling up online form to undergo 3 (three) years Diploma Courses within the State run Polytechnics for the academic session 2023-24 with effect from 1st April, 2023 till 25th April, 2023 through Department website: www.dtenagaland.org.in. The application fee of Rs. 300 (Rupees Three hundred) only to be deposited to the Department A/C No. 40201620520 IFSC Code SBIN0000214. The Candidates who have appeared HSLC/HSSLC final examination of 2023 are also eligible to apply for the Diploma Entrance Examination. The Candidate have to submit hard copy after filling up the forms along with necessary documents to Directorate of Technical Education or any of the Examinations Centre on or before 5th May, 2023.

Reservation of seats 15% reservation shall be made for Backward Tribes on the basis of One Tribe One Seat as per merit in the Diploma Entrance Exam, 10% reservation shall be made for the women candidates, 5% special reservation shall be made for Differently abled candidates with valid documents and out of the remaining seats, 90% of seats will be reserved for ST Indigenous of Nagaland and 10% of seats will be reserved for general category against the following courses: (Electrical & Electronics Engineering, Mechanical Engineering, Automobile Engineering, Computer Science & Engineering, Computer Engineering, Electronics & Communication Engineering, Information Technology, Fashion Design & Apparel Production)

Last date for submission of online application form is 25th April, 2023.

Programmes offered in the Polytechnics.

Sl. No.	Name of Polytechnic	Program Offered	No. of Seats	Minimum Qualification
a	b	d	e	f
1	Khelhoshe Polytechnic, Atoizu (KPA)	Civil Engineering	60	(i) HSLC/10+ passed with minimum aggregate of 45% in Maths & Science.
		Mechanical Engineering	30	
		Electrical & Electronics Engineering	30	
		Automobile Engineering	30	
2	Institute of Communication & Information Technology, Mokokchung (ICIT)	Computer Engineering	15	
		Electronics & Communication Engineering	15	
		Information Technology	15	
3	Government Polytechnic, Seithekema 'C' Chumoukedima	Civil Engineering	30	
4	Government Polytechnic, Sedem, Tuensang	Civil Engineering	30	
5	Government Polytechnic, Tsunazho, Chetheba, Phek	Electrical & Electronics Engineering	30	
6	Government Polytechnic, Mon	Civil Engineering	30	
7	Government Polytechnic, Wokha	Architecture Assistantship	15	
8	Government Polytechnic, Peren	Interior Design	15	
9	Government Polytechnic, Kohima (GPK)	Computer Science & Engineering	30	HSSLC/12+ Passed with minimum aggregate of 40%
		Civil Engineering	30	
		Fashion Design & Apparel Production (FDAP)	30	

Sd/-
(Er. VIPULHOU LHOUNGU)
Director

Menungra Bilemteter



Shiluyangba Walling (Khar)
28-03-2022

Küm ka süiogo, tanü anogo Kotaker den, Kong nai meimbatem den, Molutzü ajanger anisüngzükdak atongsemogo. Taremzüker aser ajemalu ne subotsü, Konang nüngsang mesükshi-i meranga inyakba nung tepela aser jangratem tangatetba, Ochi aser tongmelang nung litetba tebu ka. Apayurago, saka arishir - lir anasü alema liogo. Tsüngremer sentong ajak abensatsüogo.

Menungra bilemteter ne meimbatemi.

Temeim Kinungtsu, Chirnur aser Semchir

SÜR KÜM 4 BUBA ONOKI NA MAMATETER



YUNENCHUCHANG WALLING, KHAR
28-03-2019

Pungmang ka ama tanü na sür küm pezü buba abensar. Ne meim onoki teti bilemteter. Na bilemtetang onok mulungjang nung tepela agi asünger. Onoki na kodanga mamateter.

"Shir mulungsentü merük merüka ali parnok temoatsüba; kechiaser parnoki Tsüngrem angutsü" Mathi 5: 8

Temeim Kinungtsü aser Chirnurtem.

Myanmar mitkari par den tokteper anema inyaksü nangzük

Naypyidaw, Metsüremi/ March 27 (Agencies): Küm shia amungba Armed Forces Day nung Myanmar mitkar tashi amshia sorkar atsüngdoker rongnung lenir Min Aung Hlaing-i pa yimsüsüba anemer "kiralongrar" asoshi mera tesashi agitsü nangzük.

Linük yimtiba, Naypyidaw nung aliba parade ground ka nung Hombarnü armoured vehicles, missiles aser artillery agi medanger sepaitem tsüngkang medema jaja aodang anünglen fighter jets aser helicopter tem yima süyiba sülen pai iba o ya ashi.

Küm ana tejakdang Myanmar mitkar temi sorkar atsüngdokba anema nokdaker ajemreptsü merang operation balala agia arudang parnoki taochi mesayui civilian tem tepset, ta aitsür.

Min Aung Hlaing-i jembidang, parnok anemer temi azüdokshiba atema par mitkar sorkari bendanga mamshi, ta ashi.

Japanese sepaitemi amokbanger yimsü süa aruba anema 1945 küm army temi nokdakba temaitsü Armed Forces Day ya amunger. Iba mapang Burma ta ja aliba linük ya 1948 küm Britain yimsüsüba nungi nüjiso angu aser iba sülen timba mitkar sorkari yimsü süa arur.

2021 küm February 1 nü mitkar temi election ajanga shimba Aung San Suu Kyi'er sorkar atsüngdok aser iba yungji yimjung nung longkak ait tenzük, koba sepaitemi tashiyim amshia anendaktsütsü meranga azüdokshi lendong tulu atalok aser iba ya United Nations nung mongintem aser dangar temi civil war ka lir, ta ashi.

Mitkari yimsü asüba anema nokdaker ya pei sasa tentetba National Unity Government (NUG) lenisüba kübok lir, shirnok elected legislator tem lir aser parnok nem mitkar temi par menden magütsür aser parnok ang linük nung shidakba yimsüsürtem lir ta jembir. Parnok indang armed wing, People's Defense Forces (PDF) den ano armed ethnic minority allies temi mapang shia mitkar dak amaker.

Kasa mapang army aser air force temi yimtsüngtem nung artillery aser tayimtsü amshia amaker, aser aiben civilian tem asür aser ano meimchir temeden anema tashiyim amshir ta aitsür. Parnoki yamaji tashiyim amshiba ajanga nisung million aika tesem balala nung jenoka lir.

Par sorkari parnok anema lokti tentet tulutem ya kiralongrar telok ta

sangdonga lir aser item den sendaktepa alir ajak nem temerenshi tulu agütsür.

"NUG aser par indang PDFs temi kiralongra mapa inyakba ya tajung asoshi aser ajak asoshi azüoktsü nüngdaker," ta Min Aung Hlaing-i ashi.

"Mitkar aser sorkari iba kiralongrar telok anema mera agitsü nüngdaker, shirnoki linük akoksatsütsü meranger aser nüburtem tepseter."

Par mitkari inyaksangshiba ya yimjung asoshi lir, ta Min Aung Hlaing-i ashi aser par anemer temi azüdokshi mapa inyakba tuteta sayua meimchir temeden rakzük ta tai tongloktsüba par sorkari angatetdaktsütsü tejangraba lir, ta ashi.

Sepaitemi yimti balala nung activist tem pua reshikangshir tepsetba sülen urban guerrilla telok temi mitkar den sendaktepa alirtem dak bomb pokloktsür aser tepseter. Myanmar nung yimti tulutiba, Yangon nung mitkar den tesendaktep tajung lir ta tai tonglokja alir corporate lawyer ka Hokulbarnü khaseta liasü.

Mitkartem benjongba anema tesem jokshia kar nung longkak aita liasü.

Hombarnep Yangon yimti kübok tesem asem nung ola tulu adoka apokba angashiogo.

Office of the Longpa Senso Mongdang

Dist. : Mokokchung

Tepela Lemsateper

Ozü Longpa Senso Wb. Moatoshi Lkr election nung takok tulu anguba asoshi Tsüngrem tenüng asanger. Teyangluri alima terenlok asoshi nü taküm aser kibong temjena yujang ta sarasadema atar.


Maneni, alima kin ajunga nungi sentepa nenok telongjem nung nübo aser rongsen jenti indokba den anibelem tenlaba arema Wb. Moatoshi Lkr. tanaben tashi ajungketogo, asen Tsüngrem tajungsangi nenok kija taküm aser kibongtem tali moajangni ta sarasadem nung maneni abener.

Sd/-
(Mr. Talikümzüker Aier)
Secretary
Longpa Senso Mongdang

Sd/-
(Mr. Moakümzüker Ltr.)
President
Longpa Senso Mongdang

COMMERCIAL LAND FOR SALE

Location: Niuland Highway Attached
Adjacent to upcoming Mega Water Park
Hozukhe Village, Niuland
100x100 @ 4.50 lakhs
Land Available upto 50 Bighas
Payments can be made in 2 installments



FOR DETAILS CONTACT : 9862954673

IOC-i Russia & Belarus nunger asayartem nem tenokdangba agütsütsüla: Poland, UK, Baltic States

Metsüremi/March 27, 2023 (Agencies): Moscow-i Ukraine nungi sepaitem manin tashi Russia aser Belarus nunger asayartem 2024 Paris Olympics nung shilem magidaksütsüla, ta Poland, Britain aser Baltic states temi shiogo.

Russia-i taoba küm February ita nungi Ukraine amakba tenzüka sülen International Olympic Committee (IOC)-i linük ana nungi asayartem nem tenokdangba agütsütsü, ajisüaka Cold War mapang ama tetsükdaksü adoktsü tsübua bilema tang IOC-i linük ana nungi asayartem nem tenokdangba agütsütsü nongnanger.

IOC-i, Russia aser Belarus nunger asayartem Asian qualifying ajanga taruba küm

Paris Olympics nung neutral asayartem ama shilem agidaksütsü atema January ita lenmang ka mesapoka ayu.

"Russia aser Belarus nunger asayartem Olympics Games nung asayadaksütsü atema lenmang ka mesapoktsütsü asoshi asadangtsüba mapang ka masü ta onoki amanger," ta Polish foreign ministry-i Britain, Latvia, Lithuania aser Estonia den külem sangdong ka ajanga metetdaksü.

Neutral asayartem ya par linük nungi asayar ama mezüngshir aser parnoki takok anguba mapang linük wako mesüra naklo ken mamshir.

IOC tir Thomas Bach-i ashiba agi, iba lokti tentet ya alima yimden yimsütsüba tsütsü mangatetep adokba nung referee ka ama inyaksangshi

mesütettsü. Ajisüaka iba sentong anema linük aikati nokdakdar aser Germany densema tanga linük aikati tenokdangba agütsütsü pusema arudar.

"IOC-i tang tashi nung telemtetba kecha agia mali, ajisüaka parnok sentong asadangshia alima kintemi pusemba tenokdakba nungi masetshitsü mepeshir," ta Polish foreign ministry-isa shisem.

"Russia aser Belarus nunger asayartem international sports community dangi meyipa arutsü lenmang ka lir aser aji Belarus-i teyari agiija Russia-i Ukraine amakba anentsüla aser alima kintemi agizüker aliba ama Ukraine litsü aser sovereignty wazüka toktsütsüla," ta kasa sangdong ajanga metetdaksü.

Sudirman Cup nung India team Malaysia aser Taiwan den asayatsü

Metsüremi/March 27, 2023 (Agencies): Sudirman Cup Finals nung India nunger asayartem Group C nung Malaysia aser Chinese Taipei na den asayatsü ataogo.

Sudirman Cup ya global mixed team tetoktepbka ka lir, koba Suzhou, China nung May 14 nungi 21 tashi asayatsü.

Group C nung ano Australia team densema lir.

India-i Sudirman Cup nung tang tashi nung 2011 aser 2017 küm tajungba asaya lir. Iba küm ana nung India team-i quarterfinals tonga asayateta liasü.

Taküm February ita Badminton Asia Mixed team championships nung bronze medal anguba sülen India team Sudirman Cup atema qualify süa liasü.

Iba nungtugu asayamung nung team 16-i shilem agiba angutsü, kong continental champions China, Denmark,

Indonesia, Thailand, Japan, South Korea nunger densema lir.

Iba asayamung 12 ben tashi koker aliba China team group A nung Denmark, Singapore aser Egypt den asayatsü aser kasa mapang nung Indonesia team-a group B nung Thailand, Germany aser Canada den ata lir. Parnoki iba asayamung 1989 küm kokogo.

Group D nung Japan, iba asayamung pezüben koker aliba Korea team, France aser England team den knockout nung shilem agitsü atema tokteptsü.

Iba tetoktepbka nung tie ajak nung asaya pongungu alitsü; tebur kija asaya, tetsür kija asaya, tebur tarep asaya, tetsür tarep asaya aser tarep temeyoktepb asaya.

Sudirman Cup ya BWF World Mixed Team Championships lir koba küm ana nung khen asaya arudar.

Antonio Conte-i tangatetep nung Tottenham toktsüogo



Metsüremi/March 27, 2023 (Agencies): Antonio Conte-i tangatetep nung Tottenham toktsüogo, ta Premier League club yagi Deobarnü sangdong ka ajanga metetdaksü. Pai ita 16 coach mapa abenba sülen tang club toktsüogo.

March 18 nü Southampton den goal 3-3 agütsür draw nung tembangba sülen osangbenertem den sensaksemba mapang pa tebilemba aika lemsatepbka sülen tang pai club toktsüogo. Iba asaya ya parnoki goal 3-1 agi kokya liasü.

Arishi küm 53 tain coach shibai iba mapang 2021 küm November ita agizüka liasü pa melena season metembang tashi pa indang assistant Cristian Stellini-i coach mapa bena atatsü.

"Head coach Antonio Conte-i tangatetep nung club toktsüba

sangdonger," ta club sangdong nung shia lir.

"Antonio club nung adenba sülen mezüngbuba season nung onok Champions League atema qualify süa liasü. Antonio-i club ajangzüksü atema kechisa inyaksüogo iba atema pa dang kanga pelar aser tarutsü nung takok nguyonga aotsü imlaja atar.

"Season nung tanungba asayatem ajak Cristian Stellini lenisüba nung asayatsü aser assistant head coach Ryan Mason asütsü," ta club sangdong ajangasa metetdaksü.

Spurs mendenbuba Daniel Levy-i, "onok Premier League nung asaya 10 asayatsü anunga lir aser iba den Champions League nung jenjang ka atema asayatsü nüngdaker.

"Ajak longjemer takokba tashi temaba jenjang nung season tembangtsü asoshi merangtsüla," ta ashi.

Conte-i club toktsüba mapang Spurs pur Premier League nung pezübuba nung lir ajisüaka pongububa nung aliba team Newcastle dang nungi point ana agi dang timba lir, shirnok asaya ana agi tajemba asayar lir.

Taoba mapang Juventus,

Chelsea aser Inter Milan coach mapa inyakba mapang Conte-i league title benogo, ajisüaka Tottenham nungbo ka danga mekokteti liasü.

Pa den iba season tatem tashi tenangzüktepbka yanglur liasü.

Southampton den asaya draw nung tembangba sülen Conte-i pa kübok asayartem ya meromero ta ashiba den pressure nung junga masayatetba atema parnok aija liasü.

Paisa, Tottenham puri mapang talangka takok marok mongutetba ya manager melenjen melenba ajanga lir ta ashi.

2021 küm Spurs nung arua adenba mapang Conte-i club tai melentsütsü imla liasü, kechiyong taoba mapang pai takok aika ngutetogo.

Pa aruli season tanabuba shilem nung Spurs puri tajungba asaya tenzüker aser Arsenal pur ajateta Champions League atema qualify asü.

Spurs pur Champions League nung 1-0 aggregate agi AC Milan mekoki tsükogo aser FA Cup round pongububa nunga second-tier club Sheffield United pur goal 1-0 agi mekoki liasü.

China nung ketdangsertemi pastor...

Tesüsabo ketdangsertemi iba Arogo dang lokti adenshia tekülem sentong magitsü tuyu aser Tenla kiji shibangja liasü.

2021 küm December 21 nü police aser sorkar ketdangsertemi iba Tenla kidangi tekülem sentong tagidak mapang nung timtem agütsü aser pastor Zejun den Arogo züngsem kar pua liasü. Anogo ternü lir pa kinüngtsü

den Khristan pungobo chiok saka yaküm January 4 nü pabo tanaben jaoka liasü.

Ozüng alema lokti adenshitsu ayongzükba atema yaküm January 25 nü pa aitsü aser tepuokdak ayu. Yaküm July 13 nü People's Court of Huinong District-i pa anema ken o angadang aser pa küm ka ser ita asem tepuokdak ayutsü obendang agüja liasü.

(Tapak 5 nungi...)

Pa jail nung alidang pa semdangtsü atema kinüngertem nem temelaba agüjang, ta pai aiben mepishiyonga ketdangsertemi temelaba magütsü. Pa jail nung aliba mapang coronavirus tashidak mena saka anepadok.

Jail nung aliba mapang nunga pai külem jail nung alirtem dang sayutsüngia liasü.

North East United FC-i Alisher Kholmurodov alizükogo



Metsüremi/March 27, 2023 (Agencies): Indian Super League (ISL) club NorthEast United FC-i parnok backline akangshitsü atema Tajikistan nunger defender Alisher Kholmurodov den tenangzüktepbka ka yangluogo, ta club sangdong ka ajanga metetdaksü.

Defender shiba taoba mapang Tajikistan indang top-flight league; Vysshaya Liga nung club pezü nungi asayaogo pa tang mezüngbuba linük toktsür tanga league ka nung asayatsü.

Kholmurodov indang professional career ya Regar-Tadaz Tursunzoda nung tenzüker aser iba sülen season ana tsüngda Kuktosh FC, FC Dushanbe, aser Faykand Vose

nungi asayaogo. Arishi küm 26 tain asayar shiba centre-back ama asayar pa ya backline nung kanga junga asayaba asayar ka aser pai full-back aser central defensive midfielder ama-a asayateter.

Vysshaya Liga nung season ana asayaba mapang asaya 39 nung asayaba sülen Kholmurodov ya NorthEast United FC nung bendanger asayar Aaron Evans, Romain Philippoteaux, Kule Mbombo, Wilmar Gil, aser Joseba Beitia nunger den külemi asayatsü.

Kholmurodov team tasenba den mezüngbuba Super Cup asayamung nung shilem agiba angutsü, koba Kerala nung April 4 nü nungi tenzüka asayatsü renema lir.

BILEMDANGANG

"Timtem tekangshi melira terenlok malitsü."